

金匱玉函經

重刻張仲景金匱玉函經序

金匱玉函經八卷漢張仲景論著齊王叔和所撰次也其標題蓋亦後人所加取珍秘之意仲景當漢季年篤好方術以拯天橫其用心仁矣故自素難本草湯液諸書咸挾根得髓其為傷寒雜病論實為萬世羣方之祖自叔和尊尚以後年歲久遠錯亂放失者屢矣宋治平初命諸臣校定其

目有三曰傷寒論金匱方論

一名金匱玉函要畧以

及此經是也雖未必盡復仲景本書之舊然一家之學粗完余幼讀二論精微簡要務令上口以通思索徧求是經獨不可得後檢鄱陽馬氏經籍考雖列其目而所引晁序則實金匱玉函要畧也則此經蓋自元時而不行于世矣歲壬辰義門何內翰以予粗習張書句讀手抄宋本見授拜受

卒業喜忘寢食惜其訛脫者多甚或不能以句既無他本可校乃博考衆籍以相證佐補亡滅誤十得八九稿凡數易而始可讀則掩卷而歎曰是可報命于內翰矣內翰嘗以古明醫多以醫案示人見愛過實囑刻其平生醫藥病狀之驗者予瞿然不敢當語云三折肱為良醫予雖老是然處方設劑吾斯未信因念是經世久未見而

內翰既得禁方不自秘匿雖古人尤難之
開以傳後其弘濟豈但一師之說哉夫岐
黃之書經也仲景之經律也臨證療疾引
經案律十不失一二論所述畧具矣是書
則兼綜兩者而整齊形證附類方藥各有
門部次第不可淆亂則知經又論之自出
尤醫門之金科玉條也八卷之中上順天
和以療人患非通三才之道而得往聖之

心者不能觀者苟能潛心玩索而知其所
以則因病發藥應如桴鼓順之則能起死
畔之則立殺人先儒以孫思邈尚為粗曉
其旨得其書者未可謂不過與傷寒論及
要畧相出入而鹵莽治之也不揆淺陋願
與同志者熟讀而精思之

岑

康熙丙申陽月上海陳世傑書

重刻金匱玉函經序

吾宗懷三先生自幼學儒以多病廢遂篤嗜方書壯年由上海流寓吳門坐臥一閣近十年所手不釋卷帙精通諸禁方然未嘗以醫自夸所治輒效益務實不近名名久大震性高亮疎豁無軟熟態兩遊京師貴人爭迎之皆翩然謝歸出入里中乘壞肩輿有謁必往切脉診病其可藥與否常直言以對不爲挾要欺倖富貴人或

爲藥所誤垂死乃相招或投藥有起勢遽以庸
醫問之先生益厭苦常謾語來者曰吾不能醫
富貴人也儒門單戶有急相告卽毒熱嚴凍隨
早晚必赴愈不計其所酬薄厚其學長于仲景
嘗謂綱要精微實軒岐之繼別而自晉唐以還
名家撰論悉衍其緒故讀傷寒論及要略不但
誦數悉能心知其意惟恨未見金匱玉函經市
中見杜光庭所撰書標題恰同喜極購歸旣啟

乃知非是于是求之益亟義門何先生知先生最深得宋抄本授之窮日夜校閱卽有脫誤以他書是正歷三四寒溫而後可句尋考本序爲宋館閣秘本元明以來相沿以要畧爲此經雖丹溪之精通安道之淹貫蓋皆未見先生于是刻而傳之間嘗語余黃岐之經義深以遠仲景之書理切而要深其書而求以通經如討源而末有楫也然年久散失晦蝕于諸家之說多

矣故吾讀是書自成無已外注凡七十有二家
皆废而不觀懼文多而益昧其經爾今吾刻是
幸其久未見不爲注所厯學者潛心刻意庶幾
得之雖然其間條緒同于傷寒論者幾什之七
懼或者之又畧而弗觀不知發凡起例仲景別
有精義存焉讀論與畧者不可闕也余曰經籍
之顯晦存乎其人仲景憫宗人之彫喪拯後世
之夭橫其利溥矣是經不絕如綫而今章之其

用心旣與古密契來者難誣其寶而傳之決也
則仲景一家之書自此大昭矣丙申長至後長
洲弟汝楫書

漢書藝文志載成帝之世詔李柱國技方
技劉氏七略有醫經七家二百一十六卷
經方十一家二百七十四卷其存於今獨
黃帝內經而已素問難經本草之屬皆見
於鄭荀經簿王阮志錄要之最為古書比
于六經繼出者東漢張仲景傷寒論西晉
王叔和撰次玉函經二書寔相表裏評病
處方具有條理各詣其極乃方技中之論

語孟子書不得其門者末由語於生生也
隨書經籍志與唐宋藝文志卷目時有不
同然行於世者猶出宋治平間三館校定
可以据信吾友陳先生懷三研精覃思於
張王二書有年所矣遇疾危急羣疑共却
必予全濟於是同術驚詫目為神奇不知
惟能熟復古賢方劑視證所宜不肯妄行
旬臆以人之寄命為戲劇翕以書考之一

一可覆也先生深閤其道之晦昧務思援
古正今謂傷寒論世多有而金匱玉函經
幾無傳乃從藏書家訪求善本與選中本
再三勘校重開以通流之蓋仁人之用心
也博與愛其禁而戒勿洩者殊絕矣昔東
垣李明之著傷寒會要書遺山元裕之為
之作序余無遺山之文辭而此書為醫學
之論語孟子其已試之效亦不假予言而

始張特重先生之用心可與進於孔孟之
道也輒書其後蓋先生本儒者云
康熙丁酉正月義門何焯

校正金匱玉函經疏

金匱玉函經與傷寒論同體而別名欲人互相
檢閱而爲表裏以防後世之亡逸其濟人之心
不已深乎細考前後乃王叔和撰次之書緣仲
景有金匱錄故以金匱玉函名取寶而藏之之
義也王叔和西晉人爲太醫令雖博好經方其
學專于仲景是以獨出於諸家之右仲景之書
及今八百餘年不墜于地者皆其力也但此經

自晉以來傳之既久方證訛謬辨論不倫歷代
名醫雖學之皆不得彷彿惟孫思邈麤曉其旨
亦不能修正之況其下者乎 國家詔儒臣校

正醫書

臣

等先校定傷寒論次校成此經其文

理或有與傷寒論不同者然其意義皆通聖賢
之法不敢臆斷故並兩存之凡八卷依次舊目
總二十九篇一百一十五方恭惟

主上大明撫運視民如傷廣頒其書爲天下生

生之具直欲躋斯民於壽域者矣治平三年正月十八日太子右贊善大夫臣高保衡尙書員外郎臣孫奇尙書司封郎中秘閣校理臣林億等謹上

金匱玉函經目錄

卷一

疏序

證治總例

卷二

辨瘧溼喝第一

辨脉第二

辨太陽病形證治上第三

卷三

辨太陽病形證治下第四

辨陽明病形證治第五

辨少陽病形證治第六

卷四

辨太陰病形證治第七

辨少陰病形證治第八

辨厥陰病形證治第九

辨厥利嘔噦病形證治第十

辨霍亂病形證治第十一

辨陰陽易差後勞復病形證治第十二

卷五

辨不可發汗病形證治第十三

辨可發汗病形證治第十四

辨不可吐病形證治第十五

辨可吐病形證治第十六

辨不可下病形證治第十七

辨可下病形證治第十八

卷六

辨發汗吐下後病形脉證第十九

辨可溫病形證治第二十

辨不可火病形證治第二十一

辨可火病形證治第二十二

辨不可灸病形證治第二十三

辨可灸病形證治第二十四

辨不可刺病形證治第二十五

辨可刺病形證治第二十六

辨不可水病形證治第二十七

辨可水病形證治第二十八

論熱病陰陽交併生死證第二十九

卷七

方藥炮製

桂枝湯方第一

桂枝麻黃各半湯方第二

桂枝二麻黃一湯方第三

桂枝二越婢一湯方第四

桂枝加桂湯方第五

桂枝加附子湯方第六

桂枝去芍藥湯方第七

桂枝去芍藥加附子湯方第八

桂枝去桂加茯苓白朮湯方第九

桂枝去芍藥加蜀漆龍骨牡蠣救逆湯方

第十

桂枝加芍藥生薑人參新加湯方第十一

桂枝倍加芍藥湯方第十二

桂枝加大黃湯方第十三

桂枝人參湯方第十四

桂枝甘草龍骨牡蠣湯方第十五

桂枝甘草湯方第十六

桂枝加葛根湯方第十七

葛根湯方第十八

葛根加半夏湯方第十九

葛根黃芩黃連湯方第二十

麻黃湯方第二十一

麻黃杏子甘草石膏湯方第二十二

麻黃附子甘草湯方第二十三

麻黃附子細辛湯方第二十四

麻黃連軹赤小豆湯方第二十五

麻黃升麻湯方第二十六

大青龍湯方第二十七

小青龍湯方第二十八

小建中湯方第二十九

小柴胡湯方第三十

柴胡桂枝乾薑湯方第三十一

柴胡桂枝湯方第三十二

柴胡加龍骨牡蠣湯方第三十三

大柴胡湯方第三十四

柴胡加芒硝湯方第三十五

柴胡加大黃芒硝桑螵蛸湯方第三十六

茯苓桂枝甘草大棗湯方第三十七

茯苓桂枝白朮甘草湯方第三十八

茯苓甘草湯方第三十九

五苓散方第四十

甘草乾薑湯方第四十一

芍藥甘草湯方第四十二

炙甘草湯方第四十三

甘草湯方第四十四

厚朴生薑半夏甘草人參湯方第四十五

梔子豉湯方第四十六

梔子甘草豉湯方第四十七

梔子生薑豉湯方第四十八

梔子厚朴湯方第四十九

梔子乾薑湯方第五十

梔子黃蘗湯方第五十一

卷八

小陷胸湯方第五十二

大陷胸湯方第五十三

大陷胸圓方第五十四

又大陷胸湯方第五十五

文蛤散方第五十六

白散方第五十七

大黃瀉心湯方第五十八

附子瀉心湯方第五十九

半夏瀉心湯方第六十

甘草瀉心湯方第六十一

生薑瀉心湯方第六十二

禹餘糧圓方 缺

赤石脂禹餘糧湯方第六十三

旋覆代赭石湯方第六十四

瓜蒂散方第六十五

白虎湯方第六十六

白虎加人參湯方第六十七

桂枝附子湯方第六十八

朮附湯方第六十九

甘草附子湯方第七十

芍藥甘草附子湯方第七十一

乾薑附子湯方第七十二

十棗湯方第七十三

附子湯方第七十四

大承氣湯方第七十五

小承氣湯方第七十六

調胃承氣湯方第七十七

桃仁承氣湯方第七十八

豬苓湯方第七十九

蜜煎導方第八十

麻子仁圓方第八十一

抵當圓方第八十二

抵當湯方第八十三

茵陳蒿湯方第八十四

黃連阿膠湯方第八十五

黃連湯方第八十六

桃花湯方第八十七

吳茱萸湯方第八十八

豬膚湯方第八十九

桔梗湯方第九十

苦酒湯方第九十一

半夏散方第九十二

白通湯方第九十三

白通加豬膽汁湯方第九十四

真武湯方第九十五

烏梅圓方第九十六

乾薑黃芩黃連人參湯方第九十七

白頭翁湯方第九十八

黃芩人參湯方第九十九

黃芩湯方第一百

黃芩加半夏生薑湯方第一百一

理中圓及湯方第一百二

四逆散方第一百三

四逆湯方第一百四

通脉四逆湯方第一百五

人參四逆湯方第一百六

茯苓四逆湯方第一百七

通脉四逆加豬膽汁湯方第一百八

當歸四逆湯方第一百九

當歸四逆加吳茱萸生薑湯方第一百十

燒裯散方第一百十一

枳實梔子豉湯方第一百十二

牡蠣澤瀉散方第一百十三

竹葉石膏湯方第一百十四

麥門冬湯方第一百十五

附遺

金匱玉函經目錄

終

全匱玉函經卷第一

上海陳世傑懷三重校

漢仲景張機著

門人張邵煥有文叅

晉王叔和撰次

平江余謙牧心恭重校

宋林億等校正

門人張嵩峻天閱

證治總例

夫二儀之內惟人最靈稟天地精英之氣故與
天地相參天一生水剛柔漸形是以人之始生

先成其精腦髓既足筋骨斯成皮堅毛長神舍
於心頭圓法天足方象地兩目應日月九竅應
九州四肢應四時十二節應十二月五藏應五
音六府應六律手十指應十干足十指莖垂應
十二支三百六十節以應一歲天有風雨人有
喜怒天有雷電人有音聲天有陰陽人有男女
月有大小人有虛實萬物皆備乃名爲人服食
五味以養其生味有所偏藏有所勝氣增而久

疾病乃成諸經藏中金木水火土自相尅賊地水火風復加相乘水行滅火土救其母迭爲勝負藏氣不精此爲害道不知經脉妄治諸經使氣血錯亂正氣受刑陰陽不和十死一生經云地水火風合和成人凡人火氣不調舉身蒸熱風氣不調全身強直諸毛孔閉塞水氣不調身體浮腫脹滿喘麤土氣不調四肢不舉言無音聲火去則身冷風止則氣絕水竭則無血土敗

則身裂愚醫不思脉道反治其病使藏中金木水火土互相攻尅如火熾然重加以油不可不慎又使經脉者如流水迅急能斷其源者此爲上也

凡四氣合德四神安和人一氣不調百一病生四神動作四百四病同時俱起其有一百一病不治自愈一百一病須治而愈一百一病難治難愈一百一病真死不治

問曰、人隨土地、得合陰陽、稟食五穀、隨時相將、冬得溫室、夏遂清涼、消沴調寒暑、四季不遭傷、恐懼畏無時、忽然致不祥、肺魄不能靜、肝魂欲飛揚、心神失所養、脾腎亦乖方、六府彷徨亂、何以致安康、非鍼藥不定、盍自究精詳、答曰、肝虛則目暗、其魂自飛揚、肺衰則氣上、其魄自掩藏、心虛則不定、諸藏受迤殃、脾腎虛衰至、內結作癰瘡、六府病蝟集、諸脉失經常、及時加鍼藥、勿

使及淪亡

古者上醫相色中醫聽聲下醫診脉診候之法固是不易又云問而知之別病深淺命曰巧焉上醫相色知病者色脉與身形不得相失黑乘赤者死赤乘青者生之類中醫聽聲知病者聲合五音火聞水聲煩悶驚悸木得金聲恐懼相刑脾者土也生育萬物回助四傍善者不見惡則歸之太過則四肢不舉不及則九竅不通六

識閉塞。猶如醉人。四季運轉終而復始。下醫診脉知病者。源流移轉。四時逆順。相害相生。審知藏府之微。此爲妙也。

夫診法。常以平日。陰氣未動。陽氣未散。飲食未進。經脉未盛。絡脉調勻。氣血未亂。精取其脉。知其逆順。必察四難而明告之。然愚醫不能如斯。逆四難而生亂階者。此爲誤也。

肝病治肺。心病折腎。其次取俞募。不令流轉藏

府見肝之病當瀉肺金補肝木木子火爲父報
仇故火尅金子病以母補之母病以子瀉之蓋
云王者不受其邪而爲邪傳以得姦賊之侵病
及於一藏之中五賊相害於彼前路當先斷之
一藏不可再傷精神不中數勞次取俞募其令
五邪氣當散去之

凡婦人之病比之男子十倍難治攷諸經言病
本一體所以難治者婦人衆陰所集常與濕居

十五以上陰氣浮溢百想經心內傷五藏外損
姿容月水去留前後交互癆血停凝中路斷絕
其中傷隳不可具論生熟二藏虛實交錯惡血
內漏氣脉損竭或飲食無度損傷非一或胎瘡
未愈而合陰陽或出行風來便利穴廁之上風
從下入便成十二癰疾男子病者衆陽所歸常
居于燥陽氣游動強力施泄便成勞損損傷之
病亦衆多矣食草者力食穀者智食肉者勇以

金治金真得其真以人治人真得入神

凡欲和湯合藥灸刺之法宜應精思必通十二經脉三百六十孔穴營衛氣行知病所在宜治之法不可不通湯散丸藥鍼灸膏摩一如其法然愚醫不通十二經脉不知四時之經或用湯藥倒錯鍼灸失度順方治病更增他疾惟致滅亡故張仲景曰哀哉烝民枉死者半可謂世無良醫爲其解釋

吾常見愚人疾病有三不治重財輕命一不治
服食不節二不治信邪賊藥三不治若主候常
存形色未病未入腠理鍼藥及時服將調節委
以良醫病無不愈咸共思之又自非究明醫術
素識明堂流注者則身中榮俞尙不能知其所
在安能用鍼藥以治疾哉今列次第以示後賢
使得傳之萬世

張仲景曰若欲治疾當先以湯洗滌五藏六府

開通經脉理導陰陽破散邪氣潤澤枯槁悅人
皮膚益人氣血水能淨萬物故用湯也若四肢
病久風冷發動次當用散散能逐邪風濕痺表
裏移走居無常處者散當平之次當用丸丸能
逐沉冷破積聚消諸堅癥進飲食調營衛能叅
合而行之者可謂上工醫者意也聖道非不妙
愚醫不能尋聖意之要妙怨嗟藥石不治者此
爲謬也非聖人之過也又能尋膏煎摩之者亦

古之例也。虛則補之，實則瀉之。寒則散之，熱則去之。不虛不實，以經取之。虛者十補，勿一瀉之。實者瀉之，虛實等者瀉勿太泄。膏煎摩之，勿使復也。若虛者重瀉，真氣絕，實者補之，重其疾，大熱之氣，寒以取之，盛熱之氣，以寒發之，又不須汗下而與汗下之者，此爲逆也。仲景曰：不須汗而強與汗之者，奪其津液，令人枯竭而死。又須汗而不與汗之者，使諸毛孔閉塞，令人悶絕而

死又不須下而強與下之者令人開腸洞泄便溺不禁而死又須下而不與下之者令人心內懊懣脹滿煩亂浮腫而死又不須灸而強與灸之者令人火邪入腹干錯五藏重加其煩而死又須灸而不與灸之者使冷結重冰久而彌固氣上衝心無地消散病篤而死又須珍貴之藥非貧家野居所能立辦由是怨嗟以爲藥石無驗者此弗之思也

問曰凡和合湯藥治諸草石蟲獸用水升合消滅之法則云何答曰凡草木有根莖枝葉皮毛花實諸石有軟鞭消走諸蟲有毛羽甲角頭尾骨足之屬有須燒煉炮炙生熟有定一如後法順方是福逆之者殃又或須皮去肉或去皮須肉或須根去莖又須花須實依方揀採治削極令淨潔然後升合秤兩勿令參差藥有相生相殺相惡相反相畏相得氣力有強有弱有君臣

相理佐使相持若不廣通諸經焉知草木好惡
或醫自以意加減更不依方分配使諸草石強
弱相欺勝負不順入人腹內不能治病自相鬪
爭使人逆亂力勝刀劍若調和得宜雖未去病
猶得利安五藏令病無至增劇若合治湯藥當
取井花水極令潔淨并斗勿令多少煮之調和
一如其法若合蜜丸當須看第七卷令童子杵
之極令細熟杵數千百下可至于萬過多益佳

依經文和合調勻當以四時王相日造合則所求皆得穰災滅惡病者得瘥死者更生表鍼內藥與之令服可謂千金之藥內消無價之病

夫用鍼刺者先明其孔穴補虛瀉實送堅付濡以急隨緩營衛常行勿失其理行其鍼者不亂乎心口如銜索目欲內視消息氣血不得妄行鍼入一分知天地之氣鍼入二分知呼吸之氣鍼入三分知逆順之氣鍼皮毛者勿傷血脉鍼

血脉者勿傷肌肉鍼肌肉者勿傷筋膜鍼筋膜者勿傷骨髓經曰東方甲乙木主人筋膜魂南方丙丁火主人血脉神西方庚辛金主人皮毛魄北方壬癸水主人骨髓志中央戊己土主人肌肉智鍼傷筋膜者令人愕視失魂鍼傷血脉者令人煩亂失神鍼傷皮毛者令人上氣失魄鍼傷骨髓者令人呻吟失志鍼傷肌肉者令人四肢不舉失智鍼能殺生人亦能起死人

凡用鍼之法補瀉爲先呼吸應江漢補瀉應星斗經緯有法則陰陽不相干震爲陽氣始兌爲陰氣終坎爲太玄華坤爲太陰精欲補從卯南欲瀉從酉北鍼入因日明鍼出隨月光夫治陰陽風邪身熱脉大者以烽鍼刺之治諸邪風鬼疰痛處少氣以毛鍼去之凡用烽鍼者除疾速也先補五呼刺入五分留入十呼刺入一寸留二十呼隨師而將息之刺急者深內而久留之

刺緩者淺內而疾發鍼刺大者微出其血刺滑者淺內而久留之刺澁者必得其脉隨其逆順久留之疾出之擗穴勿出其血刺諸小弱者勿用大鍼然氣不足宜調以甘藥餘三鍼者止中破癰堅痛結息肉也非治人疾也

夫用灸之法頭身腹背肩臂手足偃仰側其上中諸部皆是陰陽榮衛經絡俞募孔穴各有所主。相病正形隨五藏之脉當取四時相害之脉

如浮沉滑澁與灸之人身有大小長短骨節豐
狹不可以情取之宜各以其部分尺寸量之乃
必得其正諸度孔穴取病人手大拇指第一節
橫度爲一寸四指爲一部亦言一夫又以文理
縫縱會言者亦宜審詳

凡點灸法皆取平正身體不得傾側寬縱縮狹
也若坐點則坐灸之臥點則臥灸之立點則立
灸之反此者不得其穴

凡諸言壯數者皆以中平論也若其人丁壯病重者可復一倍其人老弱病微者可復減半然灸數可至二三百也可復倍加火治之不然則氣不下沉雖焦而病不愈又新生小兒滿一朞以還者不過一七止其壯數多少隨病大小也凡灸須合陰陽九部諸府各有孔穴而有多少故頭背爲陽部參陰而少臂腳爲陽部亦參陰而少胸爲陰部參陽而少腹爲陰部亦參陽而

少。此爲陰陽營衛經脉事也行壯多少在數人
病隨陰陽而灼灸之若不知孔穴勿妄灸之使
病增重又人體腰以上爲上部腰以下爲下部
外爲陽部內爲陰部營衛藏府周流名曰經絡
是故丈夫四十以上氣在腰婦人四十以上氣
在乳以丈夫先衰于下婦人先衰于上灸之生
熟亦宜搏節之法當隨病遷轉大法外氣務生
內氣務熟其餘隨宜耳頭者身之元首人神之

所注氣血精明三百六十五絡皆歸于頭頭者
諸陽之會也故頭病必宜審之灸其穴不得亂
灸過多傷神或陽精立精陰魄再卒是以灸頭
止得滿百背者是體之橫梁五藏之繫着太陽
之會合陰陽動發冷熱成病灸大過熟大害人
也臂脚手足者人之枝幹其神繫於五藏六府
隨血脉出能遠近採物臨深履薄養於諸經其
地狹淺故灸宜少過多則內神不得入精神閉

塞否滯不仁卽手臂不舉故四肢之灸不宜太
熟也然腹藏之內性貪五味無厭成疾風寒固
結水穀不消灸當宜熟若大杼脊中腎俞膀胱
八竅可至二百壯心主手足太陰可至六七十
壯三里太谿太衝陰陽二泉上下二廉可至百
壯腹上上管下管太倉關元可至一百壯若病
重者三復之乃愈耳若治諸沉結寒冷必灸之
宜熟量病輕重而攻治之表鍼內藥隨宜用之

消息將之與天同心百年永安終無橫歿此要
畧說之非賢勿傳請秘而用之今以察色診脉
辨病救疾可行合宜之法并方藥共成八卷號
爲金匱玉函經其篇目次第列于卷首

金匱玉函經卷第一

終

金匱玉函經卷第二

辨瘧溼暍第一

太陽病瘧溼暍三種宜應別論以爲與傷寒相似故此見之

太陽病發熱無汗而反惡寒是爲剛瘧

太陽病發熱汗出而不惡寒是爲柔瘧

太陽病發熱其脉沉細是爲瘧

太陽病發其汗因致瘧

病者身熱足寒頭項強惡寒時頭熱面赤目脉赤獨頭動搖卒口噤背反張者爲瘓

脊强者五瘓之總名其證卒口噤背反張而瘓瘓諸藥不已可灸身柱大椎陶道

太陽病無汗而小便反少氣上衝胸口噤不得語欲作剛瘓葛根湯主之

剛瘓爲病胸滿口噤臥不著席脚攣急其人必齟齬可與大承氣湯

瘧病發其汗已其脉洽洽如蛇暴腹脹大者爲欲解脉如故反復弦者必瘧

瘧脉來按之築築而弦直上下行

瘧家其脉伏堅直上下

夫風病下之則瘧復發其汗必拘急

太陽病其症備身體強几几然脉沉遲此爲瘧括樓桂枝湯主之

瘧病有灸瘡難療

瘡家雖身疼痛不可發其汗汗出則瘥
太陽病而關節疼痛煩其脉沉緩爲中溼

病者一身盡疼煩日晡卽劇此爲風溼汗出當
風所致也

溼家之爲病一身盡疼發熱而身色似熏黃也
溼家之爲病其人但頭汗出而背強欲得被覆
向火若下之蚤則噦或胃滿小便不利舌上如
胎此爲丹田有熱胸上有寒渴欲飲而不能飲

則口燥煩也

溼家下之額上汗出微喘小便利者死若下利不止者亦死

問曰病風溼相搏身體疼痛法當汗出而解值天陰雨溜不止師云此可發汗汗之而其病不愈者何故答曰發其汗汗大出者但風氣去溼氣仍在是故不愈若治風溼者發其汗微微似欲出汗者則風溼俱去也

病身上疼痛發熱面黃而喘頭痛鼻塞而煩其
脉大自能飲食腹中和無病病在頭中寒溼故
鼻塞內藥鼻中卽愈

溼家身煩疼可與麻黃湯加朮四兩發其汗爲
宜慎不可以火攻之

風溼脉浮身汗出惡風者防已湯主之

太陽中熱暍是也其人汗出惡寒身熱而渴也
白虎湯主之

太陽中暍身熱疼重而脉微弱此以夏月傷冷水水行膚中所致也瓜蒂湯主之

太陽中暍發熱惡寒身重而疼痛其脉弦細芤遲小便已灑灑然毛聳手足逆冷小有勞身卽熱口開前板齒燥若發其汗惡寒則甚加溫鍼發熱益甚數下之則淋甚

辨脉第二

問曰脉有陰陽何謂也答曰脉大爲陽浮爲陽

數爲陽動爲陽滑爲陽沉爲陰澁爲陰弱爲陰
弦爲陰微爲陰陰病見陽脉者生陽病見陰脉
者死

問曰脉有陽結陰結者何以別之答曰其脉自
浮而數能食不大便名曰陽結期十七日當劇
其脉自沉而遲不能食身體重大便反堅名曰
陰結期十四日當劇

問曰病有灑淅惡寒而復發熱者何也答曰陰

脉不足陽往從之陽脉不足陰往乘之何謂陽不足答曰假令寸口脉微爲陽不足陰氣上入陽中則灑淅惡寒何謂陰不足答曰尺脉弱爲陰不足陽氣下陷入陰中則發熱

陽脉浮陰脉弱者則血虛血虛則筋急

其脉沉者營氣微也其脉浮而汗出如流珠者衛氣衰也營氣微加燒鍼血留不行更發熱而燥煩也

脉藹藹如車蓋者名曰陽結也

脉累累如循長竿者名曰陰結也

脉聶聶如吹榆莢者名曰散也

脉瞥瞥如羹上肥者陽氣脫也

脉縈縈如蜘蛛絲者陽氣衰也

脉綿綿如瀉漆之絕者亡其血也

脉來緩時一止復來名曰結脉來數時一止復

來名曰促脉陽盛則促陰盛則結此皆病脉

陰陽相搏名曰動陽動則汗出陰動則發熱形冷惡寒者此三焦傷也若數脉見于關上上下下無頭尾如豆大厥厥動搖者名曰動也

陽脉浮大而濡陰脉浮大而濡陰與陽同等者名曰緩也

脉浮而緊者名曰弦也弦者狀如弓弦按之不移也脉緊者如轉索無常也

脉弦而大弦卽爲減大卽爲芤減卽爲寒芤卽

爲虛寒虛相搏脉卽爲革婦人卽半產漏下男子卽亡血失精

問曰病有戰而汗出自得解者何也答曰其脉浮而緊按之反芤此爲本虛故當戰而汗出也其人本虛是以發戰以脉浮故當汗出而解若脉浮而數按之不芤此本不虛若欲自解但汗出耳卽不發戰也

問曰病有不戰而汗出解者何也答曰其脉大

而浮數故不戰汗出而解也

問曰病有不戰復不汗而解者何也答曰其脉自微此以曾發汗若吐若下若亡血內無津液陰陽自和必自愈故不戰不汗而解也

問曰傷寒三日其脉浮數而微病人身自涼和者何也答曰此爲欲解也解以夜半脉浮而解者濺然汗出也脉數而解者必能食也脉微而解者必大汗出也

問曰脉病欲知愈未愈何以別之答曰寸口關上尺中三處大小浮沉遲數同等雖有寒熱不解者此脉陰陽爲和平雖劇當愈

師曰立夏得洪大脉是其本位其人病身體苦疼重者須發其汗若明日身不疼不重者不須發汗若汗濺濺然自出者明日便解矣何以言之立夏脉洪大

一本作浮大

是其時脉故使然也四

時倣此

問曰凡病欲知何時得何時愈答曰假令夜半得病者日中愈日中得病者夜半愈何以言之日中得病夜半愈者以陽得陰則解也夜半得病日中愈者以陰得陽則解也

夫寸口脉浮在表沉在裏數在府遲在藏假令脉遲此爲在藏

跌陽脉浮而濇少陰脉如經其病在脾法當下利何以知之脉浮而大者氣實血虛也今跌陽

脉浮而澁故知脾氣不足胃氣虛也以少陰脉
弦而浮纔見此爲調脉故稱如經而反滑數者
故知當溺膿也

寸口脉浮而緊浮卽爲風緊卽爲寒風卽傷衛
寒卽傷營營衛俱病骨節煩疼當發其汗也

趺陽脉遲而緩胃氣如經也趺陽脉浮而數浮
則傷胃數則動脾此非本病醫特下之所爲也
營衛內陷其數先微脉反但浮其人必大便堅

氣噫而除。何以言之。脾脉本緩。今數脉動脾。其數先微。故知脾氣不治。大便堅。氣噫而除。今脉反浮。其數改微。邪氣獨留心中。則饑邪熱不殺。穀潮熱發渴。數脉當遲緩。脉因前後度數如法。病者則饑數脉不時。則生惡瘡也。

師曰。病人脉微而澁者。此爲醫所病也。大發其汗。又數大下之。其人亡血。病當惡寒而發熱。無休止。時夏月盛熱。而欲着複衣。冬月盛寒。而欲

裸其體所以然者陽微卽惡寒陰弱卽發熱醫發其汗使陽氣微又大下之令陰氣弱五月之時陽氣在表胃中虛冷內以陽微不能勝冷故欲着複衣十一月之時陽氣在裏胃中煩熱內以陰弱不能勝熱故欲裸其體又陰脉遲澁故知亡血也

脉浮而大心下反堅有熱屬藏者攻之不令發汗屬府者不令洩數洩數則便堅汗多則熱愈

汗少卽便難。脉遲尙未可攻。

趺陽脉數微濇。少陰反堅。微卽下逆濇卽躁煩。
少陰堅者便卽爲難。汗出在頭穀氣爲下便難。
者令微濇。不令汗出甚者遂不得便。煩逆鼻鳴。
上竭下虛不得復還。

脉浮而洪。軀汗如油。喘而不休。水漿不下。形體
不仁。乍靜乍亂。此爲命絕。未知何藏先受其災。
若汗出髮潤。喘而不休。此爲肺絕。陽反獨留。形

體如烟熏直視搖頭此爲心絕唇吻反青四肢
縻習此爲肝絕環口黧黑柔汗發黃此爲脾絕
溲便遺失狂語目反直視此爲腎絕又未知何
藏陰陽先絕若陽氣先絕陰氣後竭其人死身
色必青肉必冷陰氣先絕陽氣後竭其人死身
色必赤腋下溫心下熱也

寸口脉浮大醫反下之此爲大逆浮卽無血大
卽爲寒寒氣相搏卽爲腸鳴醫乃不知而反飲

之水令汗大出水得寒氣冷必相搏其人卽飢
跌陽脉浮浮卽爲虛浮虛相搏故令氣飢言胃
氣虛竭也脉滑則爲臑此爲醫咎責虛取實守
空迫血脉浮鼻口燥者必衄

諸脉浮數當發熱而灑淅惡寒若有痛處食飲
如常者畜積有膿也

脉浮而遲面熱赤而戰惕者六七日當汗出而
解反發熱者差遲遲爲無陽不能作汗其身必

癢也

脉虛者不可吐下發汗其面反有熱色爲欲解不能汗出其身必癢

寸口脉陰陽俱緊法當清邪中上濁邪中下清邪中上名曰潔濁邪中下名曰渾陰中于邪必內慄表氣微虛裏氣失守故使邪中於陰也陽中於邪必發熱頭痛項強腰痛脛痠所謂陽中霧露之氣故曰清邪中上濁邪中下陰氣爲慄

足膝逆冷。溲便妄出。表氣微虛。裏氣微急。三焦相溷。內外不通。若上焦怫鬱。藏氣相熏。口爛食斷。若中焦不治。胃氣上衝。脾氣不轉。胃中爲濁。營衛不通。血凝不流。衛氣前通。小便赤黃。與熱相搏。因熱作使。游于經絡。出入藏府。熱氣所過。卽爲癰膿。陰氣前通。陽氣厥微。陰無所使。客氣內入。噓而出之。聲喑咽塞。寒厥相追。爲熱所擁。血凝自下。狀如豚肝。陰陽俱厥。脾氣孤弱。五液

注下若下焦不闔清便下重令便數難臍築湫
痛命將難全

脉陰陽俱緊口中氣出唇口乾燥蹇臥足冷鼻
中涕出舌上胎滑勿妄治也到七日以來其人
微發熱手足溫此爲欲解或到八日以上反大
發熱此爲難治設惡寒者必欲嘔腹痛者必欲
利也

脉陰陽俱緊。至於吐利其脉獨不解緊去人安

此爲欲解。若脉遲。至六七日不欲食。此爲晚發。水停故也。爲未解。食自可者。爲欲解。

病六七日。手足三部脉皆至。大煩口噤。不能言。其人躁擾。此爲欲解。若脉和。其人大煩。目重。臉內際黃。亦爲欲解。

脉浮而數。浮卽爲風。數卽爲虛。風卽發熱。虛卽惡寒。風虛相搏。則灑淅惡寒而發熱也。

趺陽脉浮而微。浮卽爲虛。微卽汗出。

脉浮而滑浮卽爲陽滑卽爲實陽實相搏其脉
數疾衛氣失度浮滑之脉數疾發熱汗出者此
爲不治

脉散其人形損傷寒而欬上氣者死

脉微而弱微卽爲寒弱卽發熱當骨節疼痛煩
而極出汗

寸口脉濡而弱濡卽惡寒弱卽發熱濡弱相搏
藏氣衰微胃中苦煩此非結熱而反劫之居水

漬布冷銚貼之。陽氣遂微。諸府無所依。陰脉凝聚。結在心下。而不肯移。胃中虛冷。水穀不化。小便縱通。復不能多。微則可救。聚寒在心下。當奈何。

辨太陽病形證治第三

夫病有發熱而惡寒者。發於陽也。不熱而惡寒者。發於陰也。發于陽者。七日愈。發于陰者。六日愈。以陽數七。陰數六故也。

金匱要略卷第二
太陽之爲病頭項強痛而惡寒

太陽病其脉浮

太陽病發熱汗出而惡風其脉緩爲中風

太陽中風發熱而惡寒

太陽病或已發熱或未發熱必惡寒體痛嘔逆其脉陰陽俱緊爲傷寒

傷寒一日太陽脉弱至四日太陰脉大

傷寒一日太陽受之脉若靜者爲不傳頗欲吐

酒客不可與桂枝湯。得之則嘔。酒客不喜甘故也。

喘家作桂枝湯加厚朴杏仁佳

服桂枝湯吐者其後必吐膿血

太陽病發其汗遂漏而不止其人惡風小便難四肢微急難以屈伸桂枝加附子湯主之

太陽病下之其脉促胸滿桂枝去芍藥湯主之若微惡寒者桂枝去芍藥加附子湯主之

太陽病得之八九日如瘧狀發熱而惡寒熱多而寒少其人不嘔清便自調日二三發脉微緩者爲欲愈脉微而惡寒此陰陽俱虛不可復吐下發汗也面反有熱色者爲未欲解以其不能得小汗出身必當癢桂枝麻黃各半湯主之
太陽病初服桂枝湯反煩不解者當先刺風池風府却與桂枝湯卽愈

服桂枝湯大汗出若脉但洪大與桂枝湯若其

形如瘡。一日再發。汗出便解。宜桂枝二麻黃一湯。

服桂枝湯。大汗出後。大煩渴不解。若脈洪大者。白虎加人參湯主之。

太陽病。發熱而惡寒。熱多寒少。脈微弱者。此無陽也。不可復發其汗。宜桂枝二越婢一湯。

服桂枝湯。或下之。仍頭項強痛。翕翕發熱。無汗。心下滿而微痛。小便不利者。桂枝去桂加茯苓。

白朮湯主之

傷寒脉浮自汗小便數頗微惡寒論曰心煩微惡寒兩脚攣急反與桂枝湯欲攻其表得之便厥咽乾煩躁吐逆當作甘草乾薑湯以復其陽厥愈足溫更作芍藥甘草湯與之其脚卽伸若胃氣不和譫語少與調胃承氣湯若重發汗復加燒鍼者四逆湯主之

問曰證象陽旦按法治之而增劇厥逆咽中乾

兩脛拘急而讖語。師言夜半手足當溫。兩腳當伸。後如師言。何以知之。答曰寸口脉浮而大。浮卽爲風。大卽爲虛。風則生微熱。虛則兩脛攣其形象桂枝。因加附子於其間。增桂令汗出。附子溫經。亡陽故也。厥逆咽中乾煩躁。陽明內結。讖語煩亂。更飲甘草乾薑湯。夜半陽氣還。兩足當熱。脛尙微拘急。與芍藥甘草湯。爾乃脛伸。與承氣湯微瀉。止其讖語。故知其病可愈。

太陽病項背強几几無汗惡風者葛根湯主之
太陽與陽明合病必自利葛根湯主之不下利
但嘔者葛根加半夏湯主之

太陽病桂枝證醫反下之遂利不止其脉促表
未解喘而汗出葛根黃連黃芩湯主之

太陽病頭痛發熱身體疼腰痛骨節疼痛惡風
無汗而喘麻黃湯主之

太陽與陽明合病喘而胸滿者不可下宜麻黃

湯主之。

病十日已去。其脉浮細嗜臥。此爲外解。設胸滿脅痛。與小柴胡湯。脉浮者與麻黃湯。

太陽中風。脉浮緊發熱惡寒。身體疼痛。不汗出而煩躁。頭痛。大青龍湯主之。若脉微弱汗出惡風。不可服。服則厥。筋惕肉瞤。此爲逆也。

傷寒脉浮緩。其身不疼。但重。乍有輕時。無少陰證者。可與大青龍湯發之。

傷寒表不解心下有水氣欬而發熱或渴或利
或噎或小便不利小腹滿或微喘小青龍湯主
之

傷寒心下有水氣欬而微喘發熱不渴服湯已
而渴者此爲寒去欲解小青龍湯主之

太陽病外證未解其脉浮弱當以汗解宜桂枝
湯主之

太陽病下之微喘者表未解故也桂枝加厚朴

杏仁湯主之

太陽病外證未解者不可下下之爲逆解外者宜桂枝湯主之

太陽病先發汗不解而下之其脉浮不愈浮爲在外而反下之故令不愈今脉浮故知在外當解其外則愈宜桂枝湯

太陽病脉浮緊無汗而發熱其身疼痛八九日不解其表候仍在此當發其汗服藥已微除其

人發煩目瞑劇者必衄衄乃解所以然者陽氣重故也麻黃湯主之

太陽病脉浮緊發熱其身無汗自衄者愈

二陽併病太陽初得病時發其汗汗先出不徹因轉屬陽明續自微汗出不惡寒若太陽病證不罷不可下下之爲逆如此者可小發其汗設面色緣緣正赤者陽氣怫鬱不得越當解之熏之當汗而不汗其人躁煩不知痛處乍在腹中

乍在四肢按之不可得其人短氣但坐以汗出不徹故也更發其汗卽愈何以知汗出不徹以脉澁故知之

脉浮數法當汗出而愈若下之身體重心悸者不可發汗。當自汗出而解所以然者尺中脉微此裏虛須表裏實津液自和卽自汗出愈

脉浮而緊法當身疼頭痛宜以汗解之假令尺中脉遲者不可發其汗何以故此爲營氣不足

血氣微少故也

脉浮者病在表可發汗宜麻黃湯一云桂枝湯
脉浮而數者可發汗宜麻黃湯

病常自汗出者此爲營氣和衛氣不和故也營
行脉中爲陰主內衛行脉外爲陽主外復發其
汗衛和則愈宜桂枝湯

病人藏無他病時發熱自汗出而不愈此衛氣
不和也先其時發汗卽愈宜桂枝湯

傷寒。脉浮緊。不發汗。因致衄者。宜麻黃湯。

傷寒不大便。六七日。頭痛有熱。未可與承氣湯。其小便反清。此爲不在裏而在表也。當發其汗。頭痛者必衄。宜桂枝湯。

傷寒發汗已。解半日許。復煩。其脉浮數。可與復發汗。宜桂枝湯。

凡病若發汗。若吐。若下。若亡血。無津液。而陰陽自和者。必自愈。

大下後發汗其人小便不利此亡津液勿治之
其小便利必自愈

下之後發其汗必振寒脉微細所以然者內外
俱虛故也

下之後復發其汗晝日煩躁不得眠夜而安靜
不嘔不渴而無表證脉沉微身無大熱者乾薑
附子湯主之

發汗後身體疼痛其脉沉遲桂枝加芍藥生薑

人參湯主之。

發汗後不可更行桂枝湯汗出而喘無大熱者
可與麻黃杏子甘草石膏湯

發汗過多其人叉手自冒心心下悸欲得按者
桂枝甘草湯主之

發汗後其人臍下悸者欲作賁豚茯苓桂枝甘
草大棗湯主之

發汗後腹脹滿厚朴生薑甘草半夏人參湯主

之

傷寒若吐若下若發汗後心下逆滿氣上衝胃
起卽頭眩其脉沉緊發汗卽動經身爲振振搖
茯苓桂枝白朮甘草湯主之

發其汗不解而反惡寒者虛故也芍藥甘草附
子湯主之不惡寒但熱者實也當和胃氣宜小
承氣湯

發汗若下病仍不解煩躁茯苓四逆湯主之

太陽病發汗後大汗出胃中乾煩躁不得眠其人欲引水當稍飲之令胃中和則愈若脉浮小便不利微熱消渴者與五苓散主之

發汗後脉浮而數煩渴者五苓散主之

傷寒汗出而渴者五苓散主之不渴者茯苓甘草湯主之

中風發熱六七日不解而煩有表裏證渴欲飲水水入卽吐此爲水逆五苓散主之

未持脉時病人叉手自冒心師因教試令欬而不卽欬者此必兩耳聾無聞也所以然者以重發其汗虛故也

發汗後飲水多者必喘以水灌之亦喘

發汗後水藥不得入口爲逆

發汗吐下後虛煩不得眠劇者反覆顛倒心中懊懣梔子豉湯主之若少氣梔子甘草豉湯主之若嘔梔子生薑豉湯主之

發汗。若下之。煩熱胸中窒者。梔子豉湯主之。
傷寒五六日。大下之後。身熱不去。心中結痛。此
爲未解。梔子豉湯主之。

傷寒下後。煩而腹滿。臥起不安。梔子厚朴湯主
之。

傷寒醫以圓藥大下之。身熱不去。微煩。梔子乾
薑湯主之。

凡用梔子湯證。其人微溲者。不可與服之。

太陽病發其汗而不解其人仍發熱心下悸頭眩身瞤而動振振欲擗地者真武湯主之

咽喉乾燥者不可發其汗

淋家不可發汗發其汗必便血

瘡家雖身疼痛不可攻其表汗出則瘳

衄家不可攻其表汗出必額上促急而緊直視不能眴不得眠

亡血家不可攻其表汗出則寒慄而振

汗家重發其汗必恍惚心亂小便已陰疼與禹
餘糧圓

病人有寒復發其汗胃中冷必吐衄

本發汗而復下之爲逆先發汗者治不爲逆本
先下之而反汗之爲逆先下之者治不爲逆

傷寒醫下之續得下利清穀不止身體疼痛急
當救裏後身疼痛清便自調急當救表救裏宜
四逆湯救表宜桂枝湯

病發熱頭痛脉反沉若不瘥身體更疼痛當救其裏宜四逆湯

太陽病先下之而不愈因復發其汗表裏俱虛其人因致冒冒家當汗出自愈所以然者汗出表和故也裏未和然後復下之

太陽病未解脉陰陽俱停必先振汗而解但陽微者先汗之而解陰微者先下之而解汗之宜桂枝湯下之宜承氣湯

血弱氣盡。腠理開。邪氣因入。與正氣相搏。結於
脇下。正邪分爭。往來寒熱。休作有時。嘿嘿不欲
食飲。藏府相連。其痛必下。邪高痛下。故使嘔也。
小柴胡湯主之。

服柴胡湯已渴者。此爲屬陽明。以法治之。

得病六七日。脈遲浮弱。惡風寒。手足溫。醫二三
下之。不能食。其人脇下滿痛。面目及身黃。頸項
強。小便難。與柴胡湯後。必下重。本渴飲水而嘔。

金匱要略卷二
柴胡湯不復中與也食穀者噦

中風五六日傷寒往來寒熱胸脇苦滿嘿嘿不欲飲食心煩喜嘔或胃中煩而不嘔或渴或腹中痛或脅下痞堅或心中悸小便不利或不渴外有微熱或欬小柴胡湯主之

傷寒四五日身熱惡風頸項強脅下滿手足溫而渴小柴胡湯主之

傷寒陽脉澀陰脉弦法當腹中急痛先與小建

中湯不差卽與小柴胡湯主之

傷寒中風有小柴胡證但見一證便是不必悉具

凡柴胡湯證而下之柴胡證不罷者復與柴胡湯必蒸蒸而振却發熱汗出而解

傷寒二三日心中悸而煩小建中湯主之

太陽病過經十餘日及二三下之後四五日柴

胡證仍在先與小柴胡湯嘔止小安其人鬱鬱

微煩者爲未解與大柴胡湯下之愈

傷寒十三日不解胸脇滿而嘔日晡發潮熱而微利此本柴胡證下之不得利今反利者知醫以圓藥下之非其治也潮熱者實也先再服小柴胡湯解其外後以柴胡加芒硝湯主之

傷寒十三日過經而譫語內有熱也當以湯下之小便利者大便當堅而反下利其脉調和者知醫以圓藥下之非其治也自利者其脉當微

厥今反和者此爲內實也調胃承氣湯主之
太陽病不解熱結膀胱其人如狂血自下下者
卽愈其外不解尙未可攻當先解其外外解小
腹急結者乃可攻之宜桃核承氣湯

傷寒八九日下之胸滿煩驚小便不利譫語一
身盡重不可轉側柴胡加龍骨牡蠣湯主之
傷寒腹滿而譫語寸口脈浮而緊者此爲肝乘
脾名曰縱當刺期門

傷寒發熱嗇嗇惡寒其人大渴欲飲酢漿者其腹必滿而自汗出小便利其病欲解此爲肝乘肺名曰橫當刺期門

太陽病二日而反燒瓦熨其背而大汗出火熱入胃胃中水竭躁煩必當譫語十餘日振而反汗出者此爲欲解也其汗從腰以下不得汗欲小便不得反嘔欲失溲足下惡風大便堅者小便當數而反不數及不多大便已頭卓然而痛

其人足心必熱穀氣下流故也

太陽中風以火劫發其汗邪風被火熱血氣流
溢失其常度兩陽相熏灼其身發黃陽盛卽欲
衄陰虛小便難陰陽俱虛竭身體則枯燥但頭
汗出劑頸而還腹滿微喘口乾咽爛或不大便
久則譫語甚者至噦手足躁擾尋衣摸牀小便
利者其人可治

傷寒脉浮醫以火迫劫之亡陽驚狂臥起不安

桂枝去芍藥加蜀漆牡蠣龍骨救逆湯主之
傷寒其脉不弦緊而弱者必渴被火必譫語弱
者發熱脉浮解之當汗出愈

太陽病以火熏之不得汗者其人必燥到經不
解必清血名火邪

脉浮熱盛而灸之此爲實實以虛治因火而動
咽燥必吐血

微數之脉慎不可灸因火爲邪則爲煩逆追虛

逐實血散脉中火氣雖微內攻有力焦骨傷筋
血難復也

脉浮當以汗解而反灸之邪無從出因火而盛
病從腰以下必重而痺此爲火逆

欲自解者必當先煩乃有汗隨汗而解何以知
之脉浮故知汗出而解

燒鍼令其汗鍼處被寒核起而赤者必發賁脉
氣從少腹上衝心者灸其核上各一壯與桂枝

加桂湯

火逆下之因燒鍼煩躁者桂枝甘草龍骨牡蠣湯主之

太陽傷寒加溫鍼必驚

太陽病當惡寒而發熱今自汗出反不惡寒而發熱關上脉細而數此醫吐之故也一日二日吐之者腹中饑口不能食三日四日吐之者不喜糜粥欲食冷食朝食夕吐以醫吐之所致也

此爲小逆

太陽病吐之但太陽病當惡寒今反不惡寒不欲近衣此爲吐之內煩也

病人脉數數爲熱當消穀引食而反吐者以醫發其汗陽氣微膈氣虛脉則爲數數爲客熱不能消穀胃中虛冷故吐也

太陽病過經十餘日心下噉噉欲吐而又胸中痛大便反溏其腹微滿鬱鬱微煩先時自極吐

下者與調胃承氣湯不爾者不可與反欲嘔胸中痛微溼此非湯證以嘔故知極吐下也

太陽病七八日表證仍在其脉微沉反不結胸其人發狂此熱在下焦少腹當堅而滿小便自利者下血乃愈所以然者太陽隨經瘀熱在裏故也

太陽病身黃其脉沉結少腹堅小便不利爲無血也小便自利其人如狂者血證諦也

傷寒有熱而少腹滿應小便不利今反利者爲
有血也當下之不可餘藥宜抵當圓
太陽病小便利者爲多飲水心下必悸小便少
者必苦裏急也

金匱玉函經卷第二

終